



## **Protocol dalla radunanza communal digl cumegn da Surses digls 7 da november 2023 (nr. 04-2023)**

**Li ed oura** Sala Grava a Savognin, allas 20.00  
**Preschaints:** 129 votantas e votants  
**Parsoura:** Leo Thomann, mastral  
**Actuar:** Beat Jenal, canzlist

---

### **1. Bavagnaint ed elecziun digls dombravouschs**

Igl mastral benevainta las persungas preschaintas alla radunanza communal. Siva d'ena curta infurmaziun davart igl adiever digl lungatg e la practica da rediger e publitgier igl protocol dalla radunanza communal, constatescha igl mastral tgi la radunanza communal odierna seia neida convocada conform alla constituziun, uscheia tgi ella seia cumpetenta da decider.

#### Tractandas:

01. Bavegna ed elecziun digls dombravouschs
02. Dumonda digl ewz (Ovra electrica digl martgea da Turitg) da renovar la concessiun digl dretg dallas avas existenta per las ovras idraulicas Tinizong e Nandro ed igl ulteriour proceder an connex cun la regulaziun nova dallas relaziuns da concessiun; cunsegliaziun e deliberaziun digl affar per mangs digl cumegn d'urna Surses
03. Project d'investiziun «sanaziun dalla piazza davant igl local da pumpiers e davant la basa digl Uffezi da construcziun bassa digl Grischun a Gravas, Cunter» (etappa 2): dumonda per credit d'impegn da CHF 430'000.00
04. Project d'investiziun «renaturaziun regiun alluvieida Alp Curtegn, Radons»; dumonda per credit d'impegn da netto CHF 761'000.00
05. Revisiun parziala dalla planisaziun locala «Parnoztrail»
06. Diversas infurmaziuns
07. Varia

Igl mastral infurmescha, tgi en referent extern seia preschaint per igl affar davart la dumonda digl ewz ed ena referenta externa seia preschainta per igl affar davart igl credit per la regiun alluvieida Alp Curtegn. Percheigl dumonda'l da barattar la successiun dallas tractandas 3 e 4. La radunanza communal è anclatga cun chella midada.

Cunter la glista da tractandas na vignan fatgas nignas objecziuns, uscheia tgi chella vala scu approvada.

Scu dombravouschs vignan proponias ed eligias cun gronda pluralitad Pauli Dosch, Laurin Luzio, Mauro Guetg e Cyrill Brenn.

---

### **2. Dumonda digl ewz (Ovra electrica digl martgea da Turitg) da renovar la concessiun digl dretg dallas avas existenta per las ovras idraulicas Tinizong e Nandro e concernent igl ulteriour proceder an connex cun la regulaziun nova dallas relaziuns da concessiun; cunsegliaziun e deliberaziun digl affar per mangs digl cumegn d'urna Surses**

Igl mastral infurmescha an sia introducziun, tgi la concessiun digl dretg dallas avas digl ewz (Ovra electrica digl martgea da Turitg) per las ovras electricas Tinizong e Nandro scroda igls 31

da matg 2035. Uscheia scadan igls dretgs d'utilisaziun dall'ava digl ewz ed igl cumegn concessiunari da Surses possa disponer puspe libramaintg davart l'utilisaziun digl implant a parteir da chella data. An consequenza dalla terminaziun dalla concessiun vegia igl cumegn - ansemen cun igl cantun - igl dretg digl return agl proprietari conform allas determinaziuns dalla concessiun ed alla basa dalla legislaziun davart igl dretg dallas avas, daclera igl mastral. Igl ewz vegia dumando agl cumegn cun screiver digls 24 d'avregl 2020 da renovar la concessiun existenta. Sa basond alla legislaziun federala davart igl dretg dallas avas, stoptga igl cumegn da Surses decider aglmanc 10 onns avant la scadenza dalla concessiun, damai igl pi tard igls 31 da matg 2025, schi el seia pront da prancepi per la renovaziun dumandada digl ewz.

Per tractar chella dumonda, tgi seia fitg complexa e da gronda muntada per igl cumegn ed igl cantun, seia neida installada ena "cumischung davart igl return agl proprietari". A chella fetschan part represchentants digl cumegn da Surses, digl cumegn d'Albula/Alvra, digl cantun e divers experts externs. Chella cumischung seia neida cleramaintg alla conclusiun, da betg renovar la concessiun existenta cun igl ewz, chegl cun la fegnameira da pudeir sa tigneir davertas tot las opziuns an vista allas tractativas davart igl return agl proprietari dallas ovras electricas Tinizong e Nandro. Chella decisiun corresponda er alla strategia digl cantun Grischun conc. la forza hidraulica, precisescha igl mastral. Uscheia recumonda er la regenza grischuna agl cumegn da betg decider gio oz davart la renovaziun dalla concessiun cun igl ewz. Igl mastral accentuescha pero, tgi la proposta da negar la dumonda digl ewz seia betg drizzo cunter igl ewz. Anzi, la collaboraziun cun ewz seia adegna stada fitg bunga ed igl ewz seia sto adegna en bung partenari. Cun negar la dumonda vigna digl reminent er betg sclos la pussebladad, da tuttegna conceder la concessiun agl ewz. Chellas tractativas duessan pero succeder pir an ena sagonda fasa. Oz geiigl angal per la dumonda da prancepi per lubeir agl cumegn ed agl cantun dad aveir davertas tot las opziuns an vista allas tractativas correspondentas.

Per infurmar la radunanza communal da radagn, surdat igl mastral igl pled a dr. Gieri Caviezel, advocat e notar e cunsiglieder giuridic conc. igl dretg dallas avas dalla "cumischung return agl proprietari Tinizong". Igl expert dilucidescha da moda detagleda la situaziun actuala ed igl rom legal alla basa dalla lescha davart igl dretg dallas avas dalla confederaziun e digl cantun. Ultra da chegl preschainta el las opziuns digl cumegn e digl cantun an vista agl return agl proprietari digls implants dallas ovras electricas Tinizong e Nandro digl ewz, numnadamaintg

- igl agen adiever
- renovar la concessiun cun igl concessiunari actual, vot deir igl ewz
- dar la concessiun an en nov concessiunari .

An collaboraziun cun igl cantun, vegia la suprastanza communal examino igls divers aspects tematics dall'utilisaziun futura dalla forza hidraulica aint igls implants digl ewz. An consequenza da chell'examinaziun ins seia nia alla conclusiun tgi seia da negar la dumonda digl ewz da prolungar la concessiun e da piglier anstagl an vista ena nova regulaziun dallas relaziuns d'utilisaziun. An chest risguard possa er igl ewz esser part da chella nova regulaziun, rapeta igl expert extern las infurmaziuns digl mastral. Per la fegn dalla concessiun vegia igl cumegn (ansemen cun igl cantun) la pussebladad unica da surpiglier gratuitamaintg las parts digls indrezs bletschs resp. las parts electromecanicas (sitgas) per en prietsch commensuro. Siva possa igl cumegn (ansemen cun igl cantun) decider libramaintg davart las cundiziuns da basa, scu tg'igl implant duess neir utilisu agl futur. Igl potencial economic, scu er chel arisguard la politica d'energeia pertutgont las ovras electricas digl ewz seia fitg interessant per igl cumegn ed igl cantun e porscha schanzas considerablas. Digl reminent corresponda la nova regulaziun digls dretgs d'utilisaziun preveida alla strategia concernent la forza hidraulica digl cantun Grischun, scu tgi lez vegia formulo igl onn 2022 cun dar en'igleida sen tot igls implants hidraulics sen territori cantunal risguardond las situaziuns d'interess digls cumegns. La nova regulaziun preveida fetscha er senn ord vista dalla politica digl clima.

Considero igls fatgs menziunos fetschigl senn tg'igl cumegn, an collaboraziun cun igl cantun, fixescha da prancepi la direcziun dalla nov'utilisaziun futura dalla forza hidraulica. L'incumbensa dalla radunanza communalada dad oz seia da tractar la dumonda e da deliberar la fatschenta agl cumegn d'urna.

Siva las dilucidaziuns digl referent extern surpeglia igl mastral puspe igl pled. El mossa se las ulteriouras dumondas concernent igl return agl proprietari an connex cun las concessiuns davart igl dretg dallas avas, tgi stattan an tavla igls proxims onns aint igl cantun Grischun. Perveia dalla muntada dall'utilisaziun dallas avas pigl cumegn e pigl cantun Grischun vegia la Regenza grischuna er recumando da negar la dumonda digl ewz digl 2020, terminescha igl mastral las sias expectoraziuns avant da darveir la discussiun.

#### Discussiun:

Igls differents votums e las dumondas da ples votants vignan resumos scu suonda:

- Vogl oz gio per la decisiun da far valeir igl dretg digl return agl proprietari, u vogl oz angal da piglier ena decisiun da prancepi per tigneir davert alla suprastanza tot las opziuns an vista allas tractativas davart la dumonda dall'utilisaziun futura dallas avas pertutgont las ovras electricas Tinizong e Nandro digl ewz?
- I vo pigl svilup economic digl cumegn ed igl è impurtant da sa tigneir davertas tot las opziuns per las tractativas. I vign pero mess an dumonda sch'igl cumegn seia an maseira da gestiunar en'ovra electrica.
- Sch'ins dei oz na alla dumonda digl ewz da renovar la concessiun, vot deir chegl tgi niss betg ple an dumonda da conceder agl ewz ena nova concessiun? U fissigl tuttegna pussebel da tractar er cun igl ewz davart ena nova concessiun?
- Oz vogl per parager igl taragn an connex cun igl return agl proprietari dallas ovras electricas Tinizong e Nandro digl ewz. Ord vista economica stò igl cumegn sa tigneir davert tot las opziuns. Percheigl ins duess sustigneir la proposta dalla suprastanza. La decisiun da betg renovar la concessiun cun igl ewz n'è an chel senn betg drizzo cunter igl ewz.
- Igl è ordvart impurtant, tgi tot las opziuns restan davertas agl cumegn. En'opziun stò pero er esser l'eventuala renovaziun dalla concessiun cun igl ewz. I vign spitgia ena rasposta clera dalla vart dalla suprastanza, tgi chell'opziun seia dada.
- Cun la revisiun parziala dalla costituziun communalada è nia stipulo, tgi per affars d'impurtanza speziala seia da convocar ordavant ena radunanza d'orientaziun. Pertge è betg nia fatg chegl?
- Tge vot deir renovar la concessiun existenta? Igl ewz è gio da blers onns annò en bung partenari, percheigl ins pudess bagn renovar la concessiun cun novas cundiziuns!
- Tge consequenzas ò l'investiziun digl ewz pigl project da dulzar igl rampar a Marmorera? Ò la suprastanza sa fatg patratgs an chel risguard?

Igl mastral ed igl referent extern raspondan allas diversas dumondas e remartgas cun precisar

- tgi la proposta dalla suprastanza da negar la dumonda digl ewz, vegia exact la fegnameira da tigneir davert tot las opziuns d'ager an connex cun la dumonda digl return agl proprietari. Oz geiigl pero betg anc per lezza dumonda. Oz geiigl angal per la decisiun da prancepi per dar alla suprastanza ed agl cantun la pussebladad da manar las tractativas e parager ena proposta definitiva per mangs digl suveran.
- tgi egna dallas opziuns possa er esser da conceder ena nova concessiun agl ewz cun novas cundiziuns. Sch'ins schess pero gio ossa ea alla dumonda digl ewz, ins vess angal anc l'opziun da tractar cun igl ewz. Ins viglia pero tigneir davert tot las opziuns d'ager.
- tgi la "cumischung davart igl return agl proprietari" vegia er discuto la dumonda da convocar ena radunanza d'orientaziun. Considerond igl fatg tgi geia oz angal per tractar e deliberar igl affar davart la decisiun da prancepi agl cumegn d'urna, ins vegia desistia d'organisar ena radunanza d'orientaziun.

- tgi la dumonda davart igl return agl proprietari impedescha betg igl project digl ewz da dulzar igl rampar a Marmorera.

#### Resultat dalla votaziun:

Sen proposta dalla suprastanza communal decide la radunanza communal

- cun 103 cunter 16 vuschs d'acceptar la proposta dalla suprastanza communal ed an chel senn da deliberar igl affar per mangs digl cumegn d'urna cun la proposta da negar la dumonda digl ewz digls 24 d'avregl 2020 pertutgont la renovaziun dallas concessiuns existentas e d'infurmar igl ewz correspondentamaintg.
- cun 115 vuschs e nignas cuntervuschs d'incumbensar la suprastanza da realisar tot las maseiras an vista all'utilisaziun futura - antras igl cumegn ed igl cantun - dallas forzas hydraulicas dallas avas gio utilizadas actualmaintg ainten las ovras electricas existentas Tinizong e Nandro digl ewz, spezialmaintg:
  - preparar la basa per las concessiuns per l'utilisaziun futura antras igl nov concessionari, tgi pò esser er igl ewz;
  - evaluar la structura da participaziun futura, inclusivamaintg la realisaziun;
  - exequir igl return agl proprietari e la realisaziun da chel.

---

### **3. Project d'investiziun «reactivaziun dalla regiun alluvieida (Aue) d'Alp Curtegn, Radons»: Dumonda per credit d'impegn net da CHF 761'000.00**

Igl mastral infurmescha tg'igl perimeter da project cumpeglia ena lunghezza da canal dall'Ava da Nandro da radond 2'000 m aint igl territori dalla regiun alluvieida dall'Alp Curtegn, tgi seia d'impurtanza naziunala. Siva da precipitaziuns seia nia intervignia igls davos onns adegna puspe cun maschinas ainten la regiun alluvieida ed ainten las vallatschas laterals tgi afflueschan; ins vegia piglia or gravera u ampluno ella a rampars. Igl Uffezi per la nateira ed igl ambiant digl Grischun UNA/ANU vegia pretendia digl cumegn e dalla Corporaziun d'alp Val Nandro, da renunztgier a talas maseiras. Ultra da chegl giaveischa igl uffezi cantunal da reactivar la regiun alluvieida Alp Curtegn, vot deir i duess neir mess a disposiziun all'Ava da Nandro puspe la grondezza uriunda dalla regiun alluvieida. Per chel scopo seian preveidas differentas maseiras tgi seian neidas elaboradas dalla Corporaziun d'alp Val Nandro e digl cumegn.

Per preschentar las maseiras preveidas digl project, surdat igl mastral igl pled alla referenta Marit Richter digl biro Eichenberger Revital SA. Ella daclera an detagl tot las lavours e maseiras tg'igl project cumpeglia per reactivar la regiun alluvieida, scu descretg aint igl messadi per la radunanza communal odierna.

La referenta terminescha las sias expectoraziuns cun menziunar tgi seia impurtant da reactivar la regiun alluvieida per mantigneir e promover la flora e fauna indigena, tipica per las regiuns alluvieidas. Chellas regiuns furman mosaics complexes da divers spazis da veiver cun ena flora e fauna vasta. An cumparaziun cun pi bod seian gio svantias 90% digls spazis da veiver da regiuns alluvieidas. Las regiuns alluvieidas tgi seian anc existentas u tgi saptgan neir reactivadas seian da grond'impurtanza per la biodiversitad.

Igl mastral surpeggia puspe igl pled e daclera tgi ultra dalla revaletaziun ecologica vegian las maseiras igl avantatg tgi la sanaziun necessaria dalla Punt Curtegn existenta scroda cun la contrucziun nova. Per igl project survigna igl cumegn 30'000 puncts ecologics per maseiras substitutivas. Chels saptga igl cumegn imponder per oters projects, noua tgi stoptgan neir fatgas cumpensaziuns. En ulterior punct impurtant seia tg'igl access d'anviern a Radons vigna pi sieir, cuncheigl tg'igl lavinal Alp Pitschna stoptga betg neir traverso ple. La rumageda dalla veia scroda davent dalla Punt Pajer anfignen la Punt Curtegn ed anavant a Radons. Pinavant vigna igl viadi a Radons pi curt ed igl traffic da transit vigna minimo. Per cass tg'igl project da reactivar la regiun alluvieida Alp Curtegn vigna realiso, vegia igl UNA/ANU er consantia agl cumegn da

schlarger la veia da Tgav sur Tigia a Radons. Igl costs per schlarger chella veia seian integros aint igl project preschaint, geian pero a chint digl cumegn.

Igl costs d'investiziun per tot las parts digl project montan a ca. 2.3 milliuns francs incl. TPV, tenor stema da costs approximativa da  $\pm 25\%$ . Cotras vess la dumonda da credit da neir sottamessa agl cumegn d'urna per l'approvaziun, daclera igl mastral. Tenor art. 16 dalla lescha davart las finanzas digl cantun Grischun (LFC/FHG) seiigl dantant pussebel da dumandar l'approvaziun d'en credit net, schi seia avantmang ena garanzeia lionta pertutgont contribuziuns da cantun e confederaziun. Pigl cass preschaint vegian cantun e confederaziun mess an vista contribuziuns da radond 62% digls costs da construcziun. La Corporaziun d'alp Val Nandro seia da prancepi er ancletga da surpiglier 5% digls costs. Per tala raschung vigna igl affar preschaint sottamess angal alla radunanza communal per l'approvaziun digl credit.

Avant da darveir la discussiun infurmescha igl mastral anc, tgi per cass tg'igl project preschaint niss betg realiso, stuessan neir disfatgs tuttegna igls rampars per lung dall'Ava da Nandro scu er la veia agl sid dalla Punt Curtegn. Igl rampars per lung digl Ual Alp Curtegn stuessan neir redimensiunos ad en'otezza da rampar pi bassa, vot deir ad en'otezza da rampar d'avant igl onn 2010. Igl costs da radond CHF 120'000.00 per chellas lavours nissan purtos dalla Corporaziun d'alp Val Nandro. Igl cumegn vess da sa participar agls costs da planisaziun.

#### Discussiun:

Las diversas dumondas e remartgas da ples votants ed ena votanta vignan resumadas scu suonda:

- Cumpeglia igl credit net la construcziun da tot las veias?
- Divers rampars vegian da neir sbuos sen cumond digl Uffezi per la nateira ed igl ambiaint digl Grischun UNA/ANU. Aint igl project seia pero previa da far puspe en rampar. È chegl betg cuntradictoric?
- Tge capeta schi en rampar vign amplania? Ins dastga anc piglier or material? Schi betg vigna la pastgira bod u tard cuatada da material e savess betg ple neir cultivada. Tenor infurmezziuns digl project ins possa piglier or angal 50 m<sup>3</sup> per onn, chegl seia pero betg avonda.
- Scu vign mano igl trasse dalla veia tras Tigia e sa participeschan las pendicularas da Savognin ed igls menaschis da gastronomia a Radons agls costs dalla veia da Tgav sur Tigia a Radons?

Igl mastral e la referenta externa raspondan scu suonda allas dumondas e remartgas:

- Ea, aint igl credit net seian aint igls costs da construcziun da tot las veias.
- Ainten la cuntrada protegeida seiigl da prancepi betg lubia da far rampars. Per proteger las pastgiras ins vegia lubia aint igl project preschaint da far en rampar perchegl tg'igls interess da realisar igl project seian nias valetos pi ot tg'igl scumond da rampars.
- Aint igl project seia nia defino ena lengia d'intervenziuns. Schi chella lengia vigna contanscheida, ins possa intervignair e piglier or material.
- Deplorablaintg seiigl betg pussebel da spustar la veia tgi vo tras Tigia, perchegl tg'ins vegia betg survagnia igl taragn da persungas privatas tgi fiss sto necessari per realisar en sviamaint. Chegl vot deir tgi sen chel curt tratg a Tigia resta la veia scu anfignen ad a cò.
- Las pendicularas ed igls menaschis da gastronomia a Radons na sa participeschan betg agls costs da radond 0.5 miu. francs dalla veia.

#### Resultat dalla votaziun:

Sen proposta dalla suprastanza decida la radunanza communal cun 82 cunter 33 vuschs d'approvar igl credit d'impegn net da CHF 761'000.00 (incl. TPV) per reactivar la regiun alluvieida Curtegn a Radons an treis etappas. Chegl cun la resalva tgi cantun e confederaziun surpeglian igls costs aint igl rom mess an vista da radond 62% e tgi la Corporaziun d'alp Val Nandro surpeglia igls costs an l'otezza da 5%. La suprastanza communal vigna a madem taimp incumbensada cun l'execuziun.

#### **4. Project d'investiziun «sanaziun dalla piazza davant igl local da pumpiers e davant la basa digl Uffezi da construcziun bassa a Gravas, Cunter» (etappa 2): dumonda per credit d'impegn da CHF 430'000.00**

Igl mastral infurmescha tgi las immobiglias sen las parcelas nr. 5478 e nr. 5475 seian an possess digl cumegn da Surses. Ena part digl edifezi sen la parcella nr. 5478 vegia igl cumegn do a tschains agl Uffezi da construcziun bassa digl district 7. Igl rest dalla parcella nr. 5478 e la part digl bietg dalla parcella nr. 5475 vignan utilisos digls pumpiers da Surses.

Igl plaz davant igls bietgs seia an en schlet stadi e la drenascha digl plaz na funcziunescha betg. La part aint igl vest vers la Gelgia seia neida amplaneida cun material da sbuada e seia neida duvrada scu deponia.

Las suandontas lavours da renovaziun seian preveidas:

- allontanar la cuvreida existenta e construeir ena nova rasada da fundamaint. Aint igl areal dall'amplaneida precedenta ainten la part digl vest anfignen ena bassezza dad 1.50m, ainten l'otra part 0.90m bass.
- construeir da nov tot las lengias industrialas scu lengias digl provedimaint d'ava e dalla Swisscom, scu er la drenascha.
- sbuar l'annexa aint igl vest sot la stgela e construeir la stgela da nov.
- far ena nova cuvreida d'ena rasada; rasada tgi porta e covra AC TD 16L, cun ena fermezza dad 80 mm.

Igls costs d'investiziun montan tenor offerta a total radond CHF 430'000.00, cun en'exaktezza digls costs da  $\pm 10\%$ , daclera igl mastral. Carascheias eventualas anfignen la finiziun dalla construcziun na seian betg inclusas ainten l'offerta e possan neir fatgas valeir.

Cun las lavours da construcziun pertutgont l'etappa 1 ins vegia scumanzo igl onn 2023. Igls costs d'investiziun da CHF 200'000.00 per la realisaziun dall'etappa 1 seian nias approvos aint igl preventiv per igl onn 2023, an cumpetenzza finanziaria dalla suprastanza communal. Per la realisaziun dall'etappa 2 vignan risguardos igls costs d'investiziun da CHF 230'000.00 aint igl preventiv per igl onn 2024. Cò seiigl da remartger tgi la realisaziun da chella sagonda etappa seia stada planisada uriundamaintg pir per igl 2026 scu project separo. Percheigl vigna dumando ossa igl credit per igl project cumplessiv.

#### Discussiun:

Dalla discussiun daverta na vign betg fatg adiever.

#### Resultat dalla votaziun:

Sen proposta dalla suprastanza decida la radunanza communal cun 117 cunter 3 vouchs d'approvar la dumonda da credit da CHF 430'000.00 per la renovaziun dallas plazzas davant igl local da pumpiers e la basa digl Uffezi da construcziun bassa a Gravas, Cunter. La suprastanza communal vign a madem taimp incumbensada cun l'execuziun.

---

#### **5. Revisiun parziala dalla planisaziun locala digl «Trail da Parnoz»**

Igl affar vign preschento dad Irene Kolb, suprastanta responsabla per l'infrastructura turistica. Ella daclera tg'igl «Masterplan Bike Surses» seia nia elaboro digl cumegn an en process participativ ansemen cun diversas gruppas d'interess e tgi chel masterplan serva scu basa strategica per sviluppar anavant la purscheida da mountainbike an Surses. Scu maseira prioritaria seia preveida la construcziun d'en nov trail per principants e famiglias, tgi geia da Parnoz anfignen giu Son Martegn a Savognin. Chel trail sera la largia tranter la purscheida existenta e pussibilitescha a principants ed a famiglias da far la midada dalla veia da gôt sen en trail simpel.

Igl trail surmonta radond 200 meters d'otezza sen ena lunghezza dad 1.7 kilometers e la larghezza digl vial seia an media 1.2 meters (aint igl gôt 1 meter), infurmescha la suprastanta.

Cun la construcziun digl trail da Parnoz duess neir scumanzo la premaveira 2024. Igl costs d'investiziun montan tenor amprenas stemas da costs digl onn 2020 a radond CHF 240'000.00.

Cun la revisiun parziala dalla planisaziun locala vignan stgaffeidas las premissas davart igl plan d'utilisaziun per realisar igl trail da Parnoz. Per chel scopo ins vegia d'adattar igl plan general d'avertura digl cumegn da Surses. Per pudeir realisar igl project scu planiso igl onn 2024, s'orientescha la revisiun basignevla digls meds da planisaziun agl project e vign anticipada alla revisiun totala dalla planisaziun locala.

Schi la revisiun parziala preschainta vigna approvada dalla radunanza communal, succeda l'exposiziun da recurs publica e siva l'approvaziun antras la regenza, terminescha la suprastanza las sias expectoraziuns.

#### Discussiun:

Dalla discussiun daverta na vign betg fatg adiever.

#### Resultat dalla votaziun:

Sen proposta dalla suprastanza decida la radunanza communal cun 90 cunter 27 vouchs d'approvar la revisiun parziala dalla planisaziun locala "Trail da Parnoz".

---

## **6. Diversas infurmaziuns**

Igl mastral infurmescha

- davart igl stadi dallas lavours dall'Arena da sport a La Nars. Igl 16 da december vegia li l'avertura. Igl cumegn vign ad organisar ena festa d'inauguraziun uffiziala. En'invitaziun vigna tarmessa a tot igls casals. Pigl travagl durant igl anvien 2023/24 ins vegia fatg en contract cun la Piz Mitgel Management SA.
- tgi la proxima radunanza communal vegia li igls 11 da december 2023.
- tg'igl proxim cumegn d'urna Surses vegia li igls 21 da schaner 2024.

---

## **7. Varia**

- Igl deuto digl Surses s'infurmescha
  - davart igl stadi dalla sia moziun davart la pusebladad da manar tras votaziuns alla radunanza communal an moda electronica e betg ple cun cedels da votar.
  - davart igl stadi digl project per en implant fotovoltaic a Radons.

*Igl mastral infurmescha*

- tgi seia previa da tractar la moziun a caschung dalla proxima radunanza communal igls 11 da december.
- tgi detta nignas novas infurmaziuns davart igl project per en implant fotovoltaic. Ins vegia gia diversas sedutas e per igls 13 da november ins vegia anvido ad ena "meisa radonda".
- Patric Vincenz giaveischa tg'igl sies nom an connex cun la sia dumonda vigna protocollo. La radunanza communal digls 25 d'avregl 2022 vegia decida da conceder alla cjo sa ena contribuziun da promoziun da CHF 240'000.00 per renovar igl hotel Danilo a Savognin. Ins vegia pero stuia constatar tg'igl hotel seia savens saro. Perchegl vot el saveir tge importo tg'ins vegia gio paea alla cjo sa e tge lavours da renovaziun tgi seian neidas fatgas anfignen ossa.

*Igl mastral* infurmescha tgi tenor practica usitada ins vegia paea en'amprema rata da CHF 120'000.00 francs. Da curt vegia gia li ena seduta cugl possessour digl hotel cun dumandar tgi el vegia d'inoltrar en chint da construcziun definitiv davart las lavours exequeidas.

Igl votum d'en terz votant vign betg protocollo, cunchegl tg'el ò betg giavischia explicitamaintg tgi chegl vigna fatg.

Oters votums vignan betg fatgs.

Igl mastral sera la radunanza communal allas 22.35 cun angraztger per la participaziun e giaveischa a tots en bung arrivo a tgesa.

Tinizong, igls .....

Igl mastral:

Igl actuar:

Leo Thomann

Beat Jenal